

denckens/ vnnnd dann beyderseits Adelichen Freundschaftt wolbedachten vnnnd vorgepflogenen Rath/ sich in Ehehliche Liebe eingelassen/ mit der WolEdlen/ EhrenVielTugendreichen Jungfraw Margaretha⁵⁵/ des WolEdlen/ Gestrengen vnd Vesten Matthias von Lattorf Sel. auff Kliecken/ Saltze/ Grochwitz vnd Lindaw Erbsassen/ (welcher in seiner Jugend in vnterschiedlichen Frantzösischen Zügen sich rühlich gebraucht/ vnd jederzeit biß an sein Ende/ ein Gottesfürchtiger/ frommer/ aufrichtiger vnnnd Deutscher Mann gewesen/ auch von jedermänniglich davor geachtet/ geliebet, vnnnd gehalten worden) hinterlassenen Ehehlichen Tochter/ damahligen [Li v] Fürstlicher Anhaltischer Cammer Jungfer/ welcher er auch im Jahr Christi 1617. den 14. Junij auff dem Fürstl. Schloß allhie/ Adelichem gebrauch nach/ in beysein vnd gegenwart vielen Fürstlichen/ Gräfflichen vnd Adelichen Personen/ vermehlet vnd beygelegt worden.

Ob nun wol GOtt der Allmächtige/ nach seinem allein weisen Rath vnd Willen/ diese beyde Adeliche Eheleute mit Leibes Frucht nicht gesegnet/ vnd jhren Tisch mit Adelichen Oelpflänzlein nicht gezieret: Jedennoch so haben sie in jhrem gantzen wehrenden Ehestandt nicht wider einander gemurret/ sondern allezeit schiedlich/ friedlich/ freundlich/ vnd wie GOtt- vnd Christliebenden Eheleuten geziemet/ sich einander vertragen/ vnd eins dem andern mit sanfft-muth vnd freundlichkeit die Ehehliche Liebe/ pflicht vnd trew erwiesen/ gleich als wann in jhren beyden Leibern eine Seele/ ein Geist/ ein Hertz vnd Sinne gewesen/ Dannhero sie auch alle Wiederwertigkeit/ so jhnen begegnet/ desto leichtlicher mit Kindlichem Gehorsam gegen GOtt außstehen vnd erdulden können.

[...] [Lij r] [...] Sein Christenthumb anreichend/ ist er ein Gottseliger vnnnd frommer Mann gewesen/ welcher die Zeit seines Lebens/ in allem seinen thun vnd lassen/ der rechten gesunden Vernunft gefolget/ vnd nach GOTTES Wort vnd Willen/ so viel in dieser Schwachheit möglich/ seinen Wandel angestellet/ GOTTES Wort hat er nicht allein hertzlich geliebet/ sondern auch gerne gehöret/ die Versamlung der Heiligen/ so viel es wegen seiner vielfältigen Kranckheiten vnd Leibes Indisposition geschehen können/ fleissig besucht/ auch das heilige Abendmahl offtermahl mit eifferiger Andacht/ zu danckbarer Verkündigung des Todes JESU Christi seines vnd vnsers Erlösers/ zu stärckung seines schwachen Glaubens/ bekräftigung seiner Hoffnung/ vnd zu vermehrung [Lij v] vnd versicherung des Trostes/ wider die Sünde/ Todt/ Teuffel vnd Hölle/ gebraucht. Die heilige Schrifft Altes vnd Newen Testaments hat er jhme durch fleissiges lesen sehr bekandt gemacht/ auch grosse Lust vnd Liebe gehabt/ daraus mit vornehmen Theologis zu conferiren, vnd deroselben schriftmässige vnd gelehrte Erklärungen darüber zu vernehmen/ lesen.

Aus der wahren Gottseligkeit wachsen herfür/ gleich als von einer grünen Wurtzel/ die herrlichen Tugenden/ Demuth/ Friedfertigkeit/ Mässigkeit/ Gerechtigkeit vnd Leutseligkeit/ mit welchen er auch von dem allerhöchsten GOtt gezieret vnd begabet gewesen/ also daß/ wer mit jhme umgangen/ bekennen muß/ daß er sich der rechten Demuth beflissen/ vnd seines hohen Verstandes vnd vornehmen Gaben nie vberhoben/ seinen Nechsten nicht verachtet/ son-